



LETTRE

DE MONSEIGNEVR

LE DVC DE SVLLY.

À V R O Y.

SIRE,

Avec les mains jointes & les genoux ployez deuant le Throsne equitable de vostre Maiefté Royale, ie la supplie au nō de Dieu, & le plus humblement qu'il m'est possible, de vouloir donner iugement fauorable à mes bonnes intentions, & ne sentencier pas mes œures selon l'apetit & les interets particuliers de ceux qui pourroient auoir quelque animosité contre moy, plustost à cause du mal qu'ils m'ont fait, que pour celuy qu'ils en ont receu: lesquels vouldroyēt porter vostre Maiefté dās leurs opiniōs, luy faire embrasser leurs haines pour quitter tant de vertus Royales de Clemence, Iustice & Magnanimité, qu'avec le Royaume vous possédez par vostre heredité paternelle. Toutes lesquelles i'inuoque à mon ayde, afin d'auoir libre accès & benigne audience qui face entendre mes raisons, pour uoir à mes plaintes, & receuoir mes vœus: lesquels n'ont eu, & n'auront iamais autre but que la gloire, grandeur & felicité perdurable de vostre personne sacree, autorité Royale, Royaumes & subiets. Pour l'auancement & conseruation desquels, sçachez, Sire, au nom de Dieu, par la voix commune de vos peuples, qui est la voix du Ciel, combiē di-

gnement, laborieusement & vtilement ie me suis acquitté des charges qui m'ont esté commises par le feu Roy vostre Pere, de tres-haute & glorieuse memoire. Scachez, SIRE, en quel estat estoient les affaires de France lors qu'il m'en donna l'administration, en quel estat elles estoient à sa mort quand l'on me priua d'icelles, & en quel estat elles sont maintenant, afin que par comparaison de temps & conditions si diuerses, vous puissiez mieux iuger quel subject & quel seruiteur i'ay esté: & donnant foy aux paroles d'une personne qui a si bien seruy, à ses offres, submissions & iustifications, vous preniez certaine assurance que i'ay toute semblable deuotion & volonté pour le seruice & la grandeur de vostre Maiesté, que i'ay incessamment eue pour le feu Roy vostre Pere ( mon tres-cher Roy, vnique Maistre & bien-faicteur, depuis mes premiers ans iusques au dernier des siens. ) Laquelle mienne deuotion à vostre seruice, l'on a tousiours iusques icy non seulement empeschée, trauesee & reiettee: mais par indignitez & affronts, mille fois reyterez, essayé de me porter à toutes sortes d'extremitez, voire iusques au dernier desespoir, me rendant odieux à la Royne vostre Mere par infinis rapports, suppositions & calónies, m'imputât à crime les actions inéuitables, & à malice pourpêsee, l'inexécution des choses impossibles. I'ay preueu, i'ay predit. I'ay maintes fois aduertye de bouche, & par escrit, ( cōme ie le puis iustifier ) ceux qui ont priuatiuement à tous autres empieté l'absoluë dispositiō des affaires, le gouuernement de vostre personne & de vostre Estat, que leurs interets particuliers & procedures inuisitées en France, nous porteroiēt infailliblement aux mouuements, soufleurations, miseres & calamitez qui affligent maintenant vostre Royaume. I'ay donné des aduis à propos pour les preuenir : I'ay donné des



conseils salutaires pour les terminer : Ie me suis mille fois offert à toutes sortes d'emplois , & d'exposer mes iours & ma vie à tous perils & travaux pour vostre ser-vice, sous l'heureux auspice de vos desirez commande-mens. Mais autant de submissions & de deferēces de ma part, autant de refus & de reiectiōs de la Cour : & pour salaire de mon humilité, vn cruel redoublement d'iniures, d'offences, & d'indignitez. Tellement que tout accablé d'ennuis, chargé d'affrons & circuy de perplexités, i'ay creu ne pouuoir rien faire de plus excusable, ny plus digne de vostre compassion & misericorde, au milieu de telles esperances suspenduës, doutes & incertitudes que d'endormir mes cuisantes douleurs, tromper mes propres ressentimens, retenir mon esprit dans les patiances & souffrances accoustumees, addoucir & assaisonner les aigreurs & les amertumes des plus offencez du gouuernement present, & animez contre les possesseurs d'iceluy. Bref de maintenir ( aux lieux où i'aurois pouuoir ) toutes choses en estat proches du repos & d'une apparente tranquillité, le plus long-temps qu'il me seroit possible, sans me departir ny desister pendant des continuelles poursuittes : sollicitations, voire importunitez dont i'auois vsé pour essayer de disposer les vns & les autres à quelque traité, accommodement, reconciliation, abouchemēt, ou à tout le moins à la nomination des personnes qualifiees & capables, non suspectes aux Contendans, pour donner Conseil à vostre Maiesté sur telles diuersitez de prétentions. Mais ayant de tous costez rencōtré des oreilles fermées à toutes bonnes ouuertures & conuenables propositiōs, des cœurs irritez les vns contre les autres, endurcis à continuer leurs mauuaises procedures, & fomentier les miseres & calamitez de l'Estat, plustost que de moderer ni les vns leurs demandes, ny les autres leur refus, les premiers soustenans leurs requisitiōs estre non seulement



raisonnables, iustes, equitables, & legitiment pour-  
suiues, mais du tout necessaires pour conseruer le Ro-  
yaume en son opulence, grandeur & splendeur, & la  
succession d'iceluy en la lignee Royale, que pour la ga-  
rantir de la domination & seruitude estrangere, où ils  
disent que les Ministres de vostre Maiesté font dessein  
de le transferer: lesquels au contraire publient que leurs  
refus sont biē fôdez, & qu'il est du tout pernicieux a vn  
Roy & a son Estat de rien conceder par la force des ar-  
mes, comme voye non seulement illegitime & honteuse,  
mais entierement contraire & preiudiciable à l'au-  
thorité, grandeur & dignité Royale, sans la conserua-  
tion de laquelle il est impossible d'empescher que la  
Monarchie Françoise ne soit destruite, ou dispersee en  
pluralité de mains, comme ils disent estre le dessein de  
ceux qui vsent de procedures si extraordinaires beau-  
coup plus propres à la desolation qu'à la reformation  
d'un Estat, Toutes lesquelles raisons & allegations par  
moy considerees, & me voyant d'ailleurs tellement en-  
uironné d'armes & d'armees, qu'il est infame, honteux  
& perilleux tout ensemble, voire absolument impossi-  
ble de demourer plus long temps oyssif, inutile, & com-  
me neutre & indifferent au milieu de tant de diuers par-  
tis, qui tous se veulent prenalloir de vostre nom, de vo-  
stre autorité, de vostre seruice, du bien & de la refor-  
mation de vostre Royaume. Je me suis resolu auât que  
rien determiner de moy sur vn tel choix, de supplier en-  
cor tres humblement vos Royales Maiestez, de vou-  
loir comme d'eux mesmes, de leur propre mouuement,  
& sans deferer cet acte de prudence & de sagesse aux  
requisirions d'autrui, afin que la France en ayt a vous  
seuls l'obligation, considerer attentiuement combien  
de preiudice à vostre seruice, de trauail à vostre esprit, de  
dommage a vostre peuple peut apporter la continuatiō  
d'une guerre de telle nature que nous en voyons le cō-



manement, laquelle vous pouuez promptement terminer par des moyens si faciles, que l'obstiné refus de les embrasser engendre plusieurs scrupules dās les ames des meilleurs seruiteurs du feu Roy vostre Pere, & par consequent les vostres, puis qu'il n'est question à ce que i'ay peu descouurir des intentions de M. le Prince, que de faire expedier vne Commission au Parlement de Paris pour la recherche & perquisition des instruments, auteurs ou consentans du cruel, horrible & sanglant parricide proditoirement commis en la personne sacree du plus auguste, celebre & glorieux de tous nos Roys: ensemble pour faire rendre compte & raison: tāt à moy qui ay eu vn temps partie de la conduite des affaires & Finances de France souz le feu Roy vostre Pere iusques au iour de sa mort, que à tous ceux qui depuis icelle iusques à present ont eu part & autorité en semblable conduite, maniemēt & direction des mesmes affaires & Finances, ou quel'on tient causes de la confusion, & profusion d'icelles: nommant en mesme temps d'autres personnes que nous des plus qualifiees & preud'hommes des trois Ordres de vostre Royaume, lesquelles ne soyent adherantes ny suspectes à aucunes des parties accusantes ou accusees, pour donner conseil à vostre Majesté, tant sur la nomination de ceux qui par Commission deuont faire nos charges en attendant nostre absoluë iustification, par les voyes ordinaires & legitimes du Royaume, que pour dresser vn formulaire de l'ordre, des maximes & des reiglemens qu'il faudra d'oresnauant obseruer en la conduite, maniemēt & direction de routes les affaires de vos Majestez, & de vostre Estat. Lesquelles propositions tirees des Remonstrances du Parlement, instances de Monsieur le Prince, & Cahiers de ceux de la Religion, ainsi reduites à si peu d'articles, & reglees par bonne methode & temperemment, sont tellement iu-



fies, & propres à faire rendre iustice, que si ils ne s'en contentent, il faut qu'ils ayent des intentions toutes contraires à leurs protestations. Ce qui estant reconnu, il n'y a doubte que tous les bons François ne les abandonnent & se declarent absolument contre eux. Que si au contraire vos Majestez refusent ces ouuertures, qui concernent simplement la végeance de la mort du feu Roy vostre Pere, le reestablissement de vostre autorité & la parfaicte obeyssance qui vous est esgalement deuë par tous vos subjects: Il faut croire que ces refus ne viennent nullement de vostre interieur & propre mouuement, mais de ceux lesquels craignans quelque chose en telle recherche, tiennent vostre Majesté en subiection, & l'empeschent de suiure son inclination, & par tant que tous les bons François, vos vrais seruiteurs, doiuent se ioindre ensemble pour procurer vostre deliurance, la correction de ceux qui empeschent la Paix du Royaume, la verification des causes de la desolatiõ de l'Estat, & du parricide commis en la personne sacree d'un si grand Monarque, à la memoire duquel i'ay tant de sortes d'obligations, que vostre Maiesté ne scauroit auoir desagreable, si voyant tant de fois, & recentemēt depuis peu de iours, toute iustice m'estre deniée, mille affrons m'estre continuez, les offres de ma personne & de mon seruice reiettez, mes plaintes renduës inuitiles, mes conseils salutaires negligez, mes ouuertures pour paruenir facilement à vne bonne Paix mesprisees, & mes Lettres pour cet effect tournees en mocquerie. Je me separe maintenant de ceux qui en sont la cause (lesquels aymēt mieux voir le Royaume tomber en desolation que de laisser vostre bon naturel en sa liberté, de conceder choses si iustes & necessaires, que la tranquillité de vos suiets, le reestablissement de vos affaires, & la vengeance de la mort du feu Roy vostre Pere) pour cõioindre ma persõne, mes cõseils, mes amis, &

tous mes moyës a ceux qui protestent n'auoir autre  
 but que l'exécution de ces choses, comme du tout im-  
 portantes à vostre honneur a vostre seruice, à la seu-  
 reté de vostre vie & conseruation de vostre Empire.  
 Pour la grandeur & felicité perpetuelle desquels ie  
 prieray le Createur qu'il luy plaise benir vostre person-  
 ne, & illuminer vostre clair iugement, en sorte que  
 nulle de vos volontez ne soit preiudiciable au bien de  
 vostre seruice : mais que discernant parfaictement les  
 bonnes intentions d'auec les mauuaises, & les vtils  
 conseils, Conseillers & seruiteurs d'auec ceux qui sont  
 dommageables, vous vueillez benignement receuoir  
 le sommaire de tous mes desirs, lettres & submissions  
 precedentes: lequel se reduit à l'ouuerture des moyens  
 certains que i'ay en main pour paruenir à vne bonne  
 Paix, au reestablissement assuré de vostre autorité  
 Royale, & de vos affaires, & à la supplication tres-hum-  
 ble que ie fais à vostre Majesté, de vouloir accepter mes  
 vœus, & les offres que ie luy fais derechef, de la seruir v-  
 tilement & fidellement enuers tous & contre tous, sans  
 nul excepter, & sans autre condition que de voir mon  
 honneur en seureté, les violences que l'on ma faites re-  
 parees, & mes hontes effacees. Ou bien si la vertueuse  
 inclination de vostre Maieité en mon endroit n'est en-  
 cor assez libre & assez absoluë pour surmonter les mau-  
 uaises volōtez d'autrui, n'auoir point desagreable, (cō-  
 me ie l'en ay des-lia suppliee), que ie conioigne ma per-  
 sonne & mes supplications à plusieurs autres qui sont en  
 pareille condition, Afin qu'estans tous bien vnīs à vn si  
 louable dessein, nous soyons plus facilement exaucez,  
 comme rendus plus considerables en l'esprit de ceux  
 lesquels iusques à present ont empesché que la Iustice  
 ne fust renduë à vous mesme, à l'Estat & à nous. La-  
 quelle esperant de vostre bon naturel, ensemble l'es-



claircissement de vos volonte, & l'honneur de vos  
commandemens, i'inuoque le Tour puissant,


**S I R E,**

A ce qu'il vueille prolonger heureusement vosiours, &  
augmenter vostre domination sur route nation. De S.  
Maixant, ce 29. Decembre 1615. C'est

*Vostre tres-humble, tres-obeyssant, & tres-  
fidelle subiect & seruiteur,*

**SVLLY.**





Digitized by the Internet Archive  
in 2010 with funding from  
University of Ottawa

